

76

1. apríl

REGLUR

um störf fulltrúa, varðstjóra og eftirlitsmanna, sem starfa á vegum sauðfjárveikivarnanna.

1. gr.

Sauðfjársjúkdómanefnd skipar eða ræður fulltrúa til að hafa á hendi varðstjórn, viðhald og eftirlit með varnargirðingum o. fl., eftir því, sem hún telur nauðsynlegt.

2. gr.

Þegar fulltrúi hefur verið ráðinn skal sauðfjársjúkdómanefnd gera honum fulla grein fyrir því, hvaða störf það eru einkum, sem honum er ætlað að vinna eða sjá um, svo sem viðhald ákveðinnar girðingarlínu, varðstjórn á ákveðnu svæði, ef um vörzlu er að ræða, eftirlit með girðingum o. fl.

3. gr.

Fulltrúar skulu fyrst og fremst hafa það hugfast að halda varnarlinum svo vel við, að þær séu fjárheldar. Kemur þá til greina að hraða viðgerð þeirra að vorinu eins og unnt er og halda þeim í fullu standi yfir sumarið, og þar til fé er tekið á hús. Hvort heldur er um að ræða daglega vörzlu með girðingum eða eftirlit með vissu millibili, skulu fulltrúar brýna fyrir varðmönnum að hafa ætíð með sér nauðsynlegustu áhöld til að lagfæra eða gera við bilanir, sem fram kunna að koma. Fulltrúar skulu, að aðalviðgerð lokinni að vorinu, fullvissa sig um, að viðgerðin hafi verið vandlega af hendi leyst.

4. gr.

Fulltrúar eða varðstjórar skulu í samráði við sauðfjársjúkdómanefnd ráða varðmenn við þær varnarlinur, sem ákveðið er að hafa vörzlu við. Fer um tölu þeirra og starfstilhögun í aðalatriðum eftir ákvörðun sauðfjársjúkdómanefndar. Ráða skal til vörzlustarfa trúverðuga menn, sem rækja störfin eftir því, sem fyrir þá er lagt. Varðmenn sem ráðnir eru fyrir mánaðarlaun, skulu fara daglega með þeirri varðlínu, sem þeim er ætlað að verja, bæði til að sjá um að girðingin sé ætíð í góðu lagi og til að reka fé frá henni, eftir því, sem talin er þörf á. Þeir varðmenn, sem hafa eftirlit með girðingum, t. d. einn dag í viku eða svo, skulu fara eftirlitsferðir með jöfnu millibili og á þeim dögum, sem ætla má að eftirlitið komi að mestu gagni.

Fulltrúar og varðmenn skulu ávallt kynna sér þau fyrirmæli, er sauðfjársjúkdómanefnd setur um litarmerkingar sauðfjár, og skulu fulltrúar hafa gætur á því, í samráði við hreppstjóra, að framfylgt sé þeim fyrirmælum, sem á hverjum tíma gilda um merkingarnar.

Ef kind eða kindur sækja svo fast á varnarlínu, að varðmenn telja hættu á að þær fari í gegn, skulu þeir slátra þeim. Verði varðmenn varir við að kind eða kindur hafi komist yfir varnarlínu, ber þeim skylda til að handsama þær og farga þeim, en ef þeir eru ekki einfærir um það, skulu þeir fá sér aðstoð til þess. Varðmönnum ber að skrifa upp mörk á kindum, sem þeir farga á þennan hátt, og koma afurðum í verð, eftir því sem kringumstæður leyfa.

Ef kindur komast yfir varnarlínu eða sækja svo fast á girðingar, að þeim er slátrað fyrir þær sakir, skal fulltrúi tilkynna skrifstofu sauðfjárveikivarnanna það eins fljótt og við verður komið og gefa skýrslu um allar aðgerðir þar að lútandi.

Öll ofantalin atriði skulu fulltrúar (varðstjórar) brýna rækilega fyrir varð- 76
mönnum, þegar þeir taka til starfa, og láta þá undirrita skuldbindingu um að hlýða 1. apríl
þeim. Ef varðmaður vanrækir starf sitt, skal fulltrúi tafarlaust víkja honum frá
starfinu og ráða hæfan mann í hans stað.

5. gr.

Fulltrúar skulu hafa strangar gætur á því, að nautgripir eða sauðfé sé ekki
flutt í óleyfi yfir varnarlinur eða milli staða, sem óleyfilegt er að flytja milli. Ef
þeir verða varir við að slíkt hafi átt sér stað, skulu þeir þegar gera aðvart um
það til skrifstofu sauðfjárveikivarnanna.

6. gr.

Fulltrúar skulu eftir föngum fylgjast með því, hver í sínu héraði, í réttum
haust og vor, hvort fyrir koma kindur af öðrum fjárskiptasvæðum, vafakindur,
óskilafé eða ómerkingar, og skulu þeir í samráði við hreppstjóra sjá um að öllum
slíkum kindum verði sláttrað, en ekki seldar til lífs.

7. gr.

Fulltrúar skulu gæta þess, eftir því sem þeir fá við komið, að slátur (ósviðnir
hausar, fætur og innfyli) og ósaltaðar gærur sé ekki flutt af garnaveikisvæðum
þangað, sem garnaveikisýking er ekki til staðar. Skulu þeir gera skrifstofu sauð-
fjárveikivarnanna aðvart, ef þeir vita um að slíkir flutningar standi til eða hafi
farið fram.

8. gr.

Fulltrúar skulu um hver áramót gefa sauðfjársjúkdómanefnd ýtarlega skýrslu
um þá starfsemi, sem þeir hafa séð um á árinu. Skal þar taka fram, hvenær viðgerð
girðinga hófst og hvenær henni lauk, um ástand girðinga, hvort sauðfé hafi komizt
yfir línuna, hve margt og á hvaða tíma, og annað, er að starfseminni lýtur, enda
þótt þeir hafi áður tilkynnt skrifstofu sauðfjárveikivarnanna um einstök atriði þar
að lútandi.

9. gr.

Fulltrúar (varðstjórar, eftirlitsmenn) og varðmenn, sem tekizt hafa á hendur
fulltrúastörf, eftirlitsstörf eða vörzlu, eru sýslunarmenn ríkisins meðan þeir gegna
slíkum störfum. Ber þeim að rækja störfin af alúð og trúmennsku.

Reglur þessar eru hér með settar samkvæmt 43. og 44. gr. laga nr. 44 9. maí
1947, um varnir gegn útbreiðslu næmra sauðfjársjúkdóma og útrýmingu þeirra,
til að öðlast þegar gildi.

Landbúnaðarráðuneytið, 1. apríl 1952.

Hermann Jónasson.

Árni G. Eylands.